

**PORI MA KAN DÁDASIÉN
TESARONIKÁ NANIN BANTA
UVAMAN AMEIN BOMPON
MINO
(2 Tesaronika)
Kan Dádasí En Ma
Tesaronikai Vompon Ma
Uvanteí Pákenai Afova Vaya
Ino**

Ma vompon ma uvantein banta ino.
Baya varen orin banta Pori ino.

Uvarein orana ino.
AD fifti-tu (52) fin mi uvaren mino. Esé ma
uvarein bompon dan orivin maen manáa
viyontá báken mi uvaren mino.

Ma vompon ma uvantein baru ino.
Koriní barurá ma mana orana ifo afápá mana
un kádan biyontá ma váken mino (Aposeri
18:11 fin ná onano).

Ma vompon ma uvaman amikhein kéká ino.
Tesaroniká barurá ma monó tiyain nanin banta
ino.

Nái ana vará ma vompon uvanten nafino.
Esé arái in bompon ma uváden maen mai
oyampáké Pori iníkan Yisasini ma ovaránen
erin nain baya ano vanasii ineine máden
asuse iyaimpin mi evaránen ma vompon

uváden mi maí damú ma yákó inain baya sian amá ukhen mino.

¹ Téi Pori má Sairasin nú Timotin nú bá anon Tesaroniká kákan barurá ma mumunan nanin banta váke setin Tifóe Tiyarafenu vá Bafan Yisas Karaisini kékasí ma ukhaonafin mi ma vompon uvaman amé uno.

² *Tifóe Tiyarafenun má Bafan Yisas Karaisin má pinté ma eriyain tarisari vá ará kusin má ano vá tiretin má bano.

Porini Susu Siantan Má Amúkin Má Baya Ino

³ Mumunan tiyofi sífá tiváeyan noe, funtákein avúavá baréi siretin nan Tiyarafenu susu sianté iyá uno. Mai fara vara seyo, siretí ankani mumunan mano mo ákonæn kákani iyákayan ben moéken ará amin maran iya ono.

⁴ *Ara ara uman bariyáke ma mai uman kayo van ída ininto ma ákona e mumunan iya ma yorarí iyaona van mi minó akhempá ma Tiyarafenurá mumunan iyain kékápin ma orivé maé tiretí ankan nan amo sé iyá uno.

Bafan Yisasi Ma Erin Nain Damú Ma Banasii Avúavá Daimin Nain Baya Ino

⁵ Máan tiyá umpo mai ma variyaona uman manon aníen mi Tiyarafenu ano funtáden daimiyan pasen mi siretin e avían bei yafisimpin kainten mino.

⁶ *Tiretin ma uman amiyain anonafá Tiyarafenu ano vetin daíden uman aminten mino.

* **1:2:** Rom 1:7 * **1:4:** 2Ko 7:4; 1Te 2:19 * **1:6:** Rom 12:19

7 *Máan tinten mifo setisi Bafan Yisasi ma vei ákona enisori kayo vá ma inaru fáké ira anamuná bá ma erin nain damúi mai ma uman bariyá ótífanuna kéká tivíkan timinten mino.

8 *Mai ma erin nain damúi Tiyarafenun ma ída afová en ma inká Bafan Yisasini kama vaya ma oyan amiyáin nain kéká uman aminten mino.

9 *Baya ma ída iniyáin nain nanin banta ano ída kípán namu uron ukhein uman mamaren Bafan má beni kakhakhein ákona vái ádé ída vanten mino.

10 *Bei ma ovaránen erin nain damúi mai yanasinta afoká inten mino. Máan ma intin maen kantasí ukháin nain nanin banta ano véin amo siyan aví daní iyantiya siretin má deren maifin ban nono. Mai fara vara seyo, seti ma ontaré ma siameruna vayarái mumunan ukhare ono.

Pori Ma Amúkein Baya Ino

11 *Máan tukhein nan mi siretí ankan Tiyarafenu ano sesi funtákein nanin banta e siren béi ma araren avíká einíen bei ákonafó tirití ankaní kama ineine vá kama avúavá bá ma mumunan mano afoká uádiyain kanaí ino van mi ena ena simúkuan béin amiyá uno.

12 Minó nanin banta ano siretí kama avúava san Bafan aví daní intin maen inká béi ano siretin aví daní ino van mi simúkiyá uno. Tetisi Tiyarafenu vá Bafan Yisas Karaisin mái sarisari ano siretin má báken mai yanasinta maman dákó inten mino.

* **1:7:** 1Te 3:13 * **1:8:** Ais 66:15 * **1:9:** Ais 2:10 * **1:10:** Kor 3:4 * **1:11:** Kor 1:9; 1Te 1:2-3

2

Bafani Erin Ádé Iyantín Ma Aní Daná Dakó Inain Baya Ino

¹ Mumunan tiyofi sífá tiváeyan noe, setisi Bafan Yisas Karaisi ma erintí ma ven má manafín bá tífanuna vaya siaméku inin nono.

² Manáa vanta ano ma oriven Bafani yamú inka erikhen mino ma sin nain baya van ída vá anú duman duman ono. Máa siren ma setí ankan nan mai vompon uvamádan erikhen mino sen ma inká sakhanampa vaya sen ma intiya mai vaya ída vá ineno.

³ *Máan ma sin nain baya kayo ano ída vá tiritin kufa uádano. Mai fara vara seyo, Yisasi ma ída erikhantin maen kokhon nanin banta ano Tiyarafenu vá aruviyantín maen mai ma man baya ma átakharé iyáin nain banta maman dákó inten mino. Mai vantan Tiyarafenu ano kákan uman aminten mino.

⁴ *Mai vanta ano ve aví daní uren maen Tiyarafenun ma araren monó tiyain oyampá baya siren beni kákan monó namumpin un kumamen téi Tiyarafenu umpo sen tiví daní ono sinten mino.

⁵ Téi ma sirití ankan má báké maé mai vaya fefa suron mi siamikhá umpo ídá ovare me iniya rafono.

⁶ Intéa yaná anó béin pákaran ná baren nafi mai saréa inka afová iya ono. Mai fara vara seyo, veni yamú ma erintin mi yákó inten mino.

* **2:3:** 1Ti 4:1; 1Yn 2:18; 4:3 * **2:4:** Isi 28:2; Dan 11:36

⁷ Man baya ma átakharéin ákona ano aúpá báken pefái yoriyái fura sé tiamiyá uno. Máan tukhen mifo mai ma iyáká inain banta ma yo avían kaúdantin mi mai yaná dákó inten mino.

⁸*Mai ma man baya átakharé iyá inain banta ano ma e unen afoká édavuvintin mi ínaimpáké ma Bafan Yisasi erinten mino. Eriven maen bei ákona vayafó mai vanta maman barasí uren khakhan ákona fókéi mai vantai ákona yo varanten mino.

⁹*Man baya ma átakharéin banta ma erin nain mai Ban Anoni ákona fói yoriyan mino. Máan tiyan pasen enará ukhein avúavá bá inká aní daná bá maman afoká inten mifo mai kampun danasinta ino.

¹⁰ Tiyarafenui aran nanápin ma vain nanin banta kayo mai vanta ano ara ara mákasimpó betin máden kufa uádante mino. Mai fara vara seyo, fura vaya ano vetin ayaintin mumunan ino van iyan mifo mai van beti ída anunu ukhen mino.

¹¹ Máan tukhantín pasen Tiyarafenu ano ákona mákasin tiantantín mai kéká mákádantín mai kampun bayará pura ino sinten mino.

¹² Máan tintin maen mai ma Tiyarafenui fura yanáká ma ída mumunan inton ma namu avúava san ma anunu ukharéin nain kékái Tiyarafenu ano ínaimpá daíden uman aminten mino.

Mumunan Nanin Banta Ano Ma Mantaan Ákona In Baya Ino

* **2:8:** Ais 11:4; Rev 19:15 * **2:9:** Rev 13:11-13

13 *Máan tukhein nan mi mumunan tiyofi sífá tiváeyan noe, Bafan mano ma anunu uren avábá uantiyain monó nanin banta van mi ena ena yamú Tiyarafenu vaípa tusu siantiyá tiféuno. Mai fara vara seyo, setin ma evaránen tivíkein daná afová ino siren mi esé araíintá Tiyarafenu ano siretin aní ukharé in mi Kantá Aunani funtákein doran mano sireti maman avusese en mino. Máan turen mi mai ma fura yanáká mumunan iyaonarái evaránen aviren mino.

14 Mai kama vava ma siamé tiferunarái setisi Bafan Yisas Karaisini kakhan aúpin bano van béi siretin arakhen mino.

15 Máan tukhein nará mumunan tiyofi sífá tiváeyan noe, mai ma vompon po safi áa soo fo safi ma siamiyáké afova ameruna vava vá pákaan ákona uveya mairasá mantano.

16 Tetisi Bafan Yisas Karaisin má Tifóe Tiyarafenu vá ano setin tivábá uren mi vei sarisari fóké para van oriyan ban ará ákona vá inká kamaen báken ma avein avúavá bá timen mino.

17 Béi ano vá tiretin ma minó kama avúavá bariyaona vá inká kama vava kayo ma siyaonafin masá ákona uantano.

3

Porin Amúkuantano Van Ma Inaúkein Baya Ino

1 Mumunan tiyofi sífá tiváeyan noe, ma sípá bayan té uno. Mai ma Bafani kama vava ma siretí ankan inire ma mai aránaópá baona vava minó akhempá tiamé orera ékun banasi ano

* 2:13: Efe 1:4; 2Te 1:3

iniren mai vaya aránaópá bano van mumpo vá amúkusintano.

² Amúkesin ná namu vanta kayo ano ma setin uman timiyain pinte vá Tiyarafenu ano siya ino. Mai fara vara seyo, minó ano ída Bafantá mumuman ukhen mino.

³ Máan tukhen mifo Bafan mano ma sirein baya ánain pura sen bákuriyain mi vantin tiretin ákona amiren dafíkantin Ban Anon mano siretin ída uman aminten mino.

⁴ *Mai ma siretin nan barano van ma siamé tiferuna yanasinta kama e variyan nan Bafan mano setin ineine simí afová ukheruna ínainpá deren mai avúavá pákaresin banten mino.

⁵ Áesin ná Bafan mano siretin ayainti vá Tiyarafenu ano ma vanasi avábá iyain má inká Yisas Karaisi ma mantaan ákona uven uman barein má afová ure vá mai ma einí ono.

Ída Ma Avesara In Baya Ino

⁶ *Mumunan tiyofi sifá tiváe oe, setisi Bafan Yisas Karaisin avíkái ma man baya siamé uno. Mai ma siamikhé tiferuna vaya ánain ma ída yakhafiyán ma avesaraen noin kéká áde ída vá orono.

⁷ *Mai fara vara seyo, siretin má ma váké maé tetí ankan ída sivesara iyákuya fefái afová ukha ompo setinti sivútivá ánain mana vá bákurono.

⁸ *Ída mana yunan para variyá umpo miyaní uré anan bariyá uno. Máan tiyái siretin ída uman ameno van pasé inuran má baya má ákona yorarí uré mai yanasinta variyá uno.

* **3:4:** 2Ko 7:16; Kar 5:10

* **3:6:** Rom 16:17

* **3:7:** Fir 3:17

* **3:8:** 1Te 2:9

9 *Tetí ankan kasaé dunan inantiré nanunaren mifo mai avúavá ódareya mai ánain bákurono van mi siretin aní é uno.

10 Para vara seyo, siretí ankan má ma váké maé ma man bayan tiamikhá uno. “Mana vanta ano ma avesara uren ída yoranten maen mai vanta ano ída vá dunan nano.”

11 *Máa sé tiamikharéi inékun tiretin aúbanté manáa ano avesaraen nóken ena kékái yoran aa iyáden avesera amiyan ne sen me sisimí iniyá tiféuno.

12 *Máa sé iniréi Bafan Yisas Karaisin avíká máan nanin banta van manará báken dunan dóden nano van mi ma man baya siamiyá uno.

13 *Máan tiyantiya mumunan tiyofi sifá tiváeyan noe, puntákein avúavasí in nan ída vá avesara ono.

14 Ma vompompin ma siamé tiferuna vaya ánain ma ída yakhafin nain nanin banta vá ída o muntessin ná betíi avúava san ayave van ino.

15 *Ída vá béin namuro an de vá afá aváen ma man baya siameinisá ono.

Porini Amusin Baya Ino

16 Ara ara uman mano siretin amaniná erinten mifo áesin ná ará kusin benafo Bafan mano ena ena ará kusin amiren ná tiretin má bano.

17 Téi Pori anon te siyampókéi ma kípán baya uvádéi sesi aní daná mairá kaé uno. Minó bompon kayorá máan manan ukhé uno.

18 Tetisi Bafan Yisas Karaisini sarisari ano siretin má banti vá bano.

* **3:9:** 1Ko 9:4; 1Te 1:6 * **3:11:** 1Ti 5:13 * **3:12:** 1Te 4:11

* **3:13:** Kar 6:9 * **3:15:** 1Te 5:14

YISASINI KAMA VAYA
The New Testament in the Agarabi language of Papua
New Guinea

Nupela Testamen long tokples Agarabi long Niugini

Copyright © 2010 The Bible Society of Papua New Guinea

Language: Agarabi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2013-01-07

PDF generated using Haiola and XeLaTeX on 18 Apr 2025 from source files dated 31 Aug 2023

105c264e-e2fa-503a-9726-8b662c09b700